

IL PLEVAN E LA DUTRINE

La redazion e à decidût di publicâ chest servizi parcè che lu riten un contribût valit e ancje par proteste cuintri de Vite Catoliche, che e à metût un toc (22.01.1983) e po e à cjonçât a sec "par proteste di cualchidun". Chest al é un spieli de pocje libertât ch'è esist là che si predicje la libertât; at che il diretôr nol varès vût di fâ dopo di vê scrit, tune rispueste a di un letôr. Se cun chest si vûl dî, invece, che ce che nol plâs nol va metût tal gjornâl, jo mi permet di no sei dacuardi... E parcé no preseâ ancje di un parê diferent? A rivuart po di chei che a àn rugnât prime ancjemó che un al podès dî ce ch'al veve di dî, no 'nd é coments di fâ. Dome vergognâsi di lôr e augurâur che la int e vedi il stes sisteme cuant ch'a viergin la bocje par puartâ la lôr teolighe.

Un plevan gno amì, fin di lenghe e di voli, mi à vût dit une volte che l'Azion Catoliche e jere chê robe "con la quale o senza la quale, la parrocchia resta tale e quale".

Nol jere infalibil, che ben s'intint, ma la sô esperienze lu sburtave a fevelâ cussì. E no dome lui.

Poben, fevelant di dutrine, no sai trops predis che, dopo une vite di tontonaments e di lambics e di torturis, a podaressin rivâ a lis stessis conclusions: che la dutrine e jê chê robe che, fasintle o no fasintle, la int e reste compagne di prime. Chest nol è un rimpin par no fâ un colp, ma un avîs che alc nol va te nestre tradizion catechistiche.

Par breveâ, o doprarai la peraule "dutrine" tal sens plui larc e plui grant de peraule, intindint "catechesi", "kerigma", "annuncio", "messaggio", "contenuti" e altris peraulis dal gjenar.

I predis a àn simpri fate dutrine e si son spolmonâts e ingjaulâts e a àn fruiât cîl e bachetis par fâur jentrâ te crepe de int i misteris de nestre sante religjon. Rivâ a capî cemût che un misteri si pò spiegâlu e capîlu e jê un'altre cuistion. La sostanza e reste. La canae, po, se si vise cun nostalgjie des corsis ator dal sagrât intant che si spietave il siôr Santul, cuant che s'impense di chei tims i duelin ancjemò lis vuadulis e lis umiliazioms. E no dîs ben, un lafè.

Peraulis intrigosis, ideis astratis, concets che Diu nus vuardi, une chiriele che si bramave dome l'ore de mude par finîle une volte par simpri. E di fat a son restâts dibot ducj cu la dutrine di cuant ch'a jerin fruts.

Podopo al è rivât il grant vueit. Il vecjo, nol leve ben; la memorie e jere antipedagogjiche; l'autoritât e jere in crise; la societât no jere plui chê. Si à spietât il gnûf. Cumó ch'al é rivât il gnûf, la dutrine e va simpri al mancul, seben che lis struturis catechistichis a cjapin simpri plui pît, e nissune plêf e paisut no si permetarès mai di sei sfurnide di comissions, registris, sussidis e catechiscj. Ancje la file dai libris tal cjanton de sacrestie e je cressude. Ma la int vivie la dutrine? Le capissie? I interessie? Le preseie? Le sintie un jutori o un pês? E la

zoventût ce pensie? Cemût mai che a àn tante pocje voe e gole di vignî? E cemût mai che no si viodin lusôrs di sorte te condote dai nestrîs paîs? Isal di butâ vie dut?

Ise dute colpe de int? Isal il câs di gambiâ sisteme?

Prin di frontâ il probleme mi permet doi câs, resints.

Un plevan al jentre in scuele e al tache a tontonâ che Diu and è un sôl parcè che al è infinît. Che se nol fos infinît al sarès finît ealore nol sarès plui Diu ma ant scugnarès jessi un altri. E vie cun cheste danze. Domande: "Parcè and isal un sôl Diu?" Rispueste dal frut dut platât sot dal banc: "Parcè che s'ant sarès doi, si cavilaressin!".

Un altri plevan si confesse in congreghe: «Ur fâs dutrine par dut l'an di file, ploe e bontimp. Un'ore interie e pachis che Jesu Marie Signôr. Epûr no vegnin! Ce mondat ch'ò vivin!». Ancje jo mi soi cjatât, tal frontâ un paîs gnûf, cul probleme de dutrine. No ài ancjemó no tacât e salacor no tacarai mai. Almancul no tal sens che lu intint plui di cualchidun ancje in alt. O sai ch'e je une cuistion grivie e o cirarai, par tant ch'al è pussibil, di sclarî ce ch'ò intint e che mi propon.

Prin di dut no aceti la dutrine sicu indutrinament. E je une carognetât efetive che si fasile su la piel dai fruts.

Cul stes sisteme a àn reson i comuniscj de Russie e de Chine di imboconâ la lôr canae insegnant la lôr dutrine.

O chei di Gjove. No si pó approfîtâsi di animis inocentis imboconantlis cun robis che no puedin capîlis cun spirt critic o parâsi. E je une violence. Pa la cuâl, ai fruts di Visepente o cirarai di insegnâur a cjalâ il mont, i fats de vite, lôr e di chei altris, lis stagjons, il ben e il mâl, il dolôr e la muart, la virtût e lis pecjis, cirint sore dut di judâju a viergi i vôi e il cûr e l'anime sul mont. Ma cence nissune pression e risprietant chei timps che la nature stesse e proviôt e e pratint. Man man ch'a cressin, s'al sarà il câs, a lassaran jentrâ la lûs te lôr anime. Senó ur restarà almancul chest barcon viert sun chest mont e il grant pont di domande sun chel altri.

I valôrs umans, chei sì che ur ai insegnarai, al impâr di cualunche mestri o gjenitôr o nono. A fasin part de vite. E la vite e je la prime, grande dutrine.

O starai atent a no confondi culture religjose cun dutrine. La dutrine e je il troi ch'al mene a Diu. La culture e je un'altre robe, che si pó imparâle suntune enciclopedie o suntun libri par chel cont o, naturalmentri, su la Bibie.

Se e cuant che ur interessarà. La dutrine e je prin di dut vivi il sens di Diu, plui che no savê cui ch'al jere chel o chel altri. E sul sens di Diu ant varès tantis di dî, ancje in merit a di chei libris di dutrine, vignadiçs e imponûts, ch'a passonin pes parochiis e che ducj a protestin ma che nissun nol à il fiât di inibîju te sô glesie. Une volte si veve une pôre santissime di Diu. Salacor masse, e si pó vê masse pôre e rivuart di un ch'al è tant grant. Cumó però o sin passâts dal sec a la montane. Sparît il timôr di Diu, ch'al jere (e ch'al reste) il cjaveç de sapience (*initium sapientiae*), cumó al somee che dute la santissime Trinitât nus sedi plombade a dimplen tal nestri stât di

famee: Diu al è pari, Crist al é fradi, la Madone e je mari, i Sants a son fradis plui dispatussâts, il Spirt al è di cjase. Dute une grande parentât. Migo di vergognâsi ve a vê int tant di sest. Ma Diu no isal simpri chel che no si pó ni viodilu ni cognossilu ni capîlu e ch'al é a stâ tune lûs che no si pó sdongjâsi? E no isal il fin di un cjaminâ tant lunc che nissun om e dute l'umanitât insieme no rivaran fint alì? Stin atents, che une religjon lamie no tignarà sú pël intes provis de vite. E sore dut, se je banâl e infantîl, e fasarà nassi dome insigurece e disperazion plui indenant, cuant ch'è coventarà plui che no l'aghe di bevi. Diu al va adorât tal misteri, no spiegât tai paragons. E stupits par soreplui. La dutrine e je un insegnâ a pleâsi denant di ce che no si viôt plui che lâ a sbisiâ dentri.

E no vin di dismenteâ mo un'altre grande veretât, che masse voltis le trascurin parcè che o sin masse usâts a doprâ peraulis grandis e santis e lis strapacìn. Come che il pastôr al è un sôl, Crist, cussì ancje il "catechist" al è un sôl, Lui. E nissun predi o vescul o ufizi nol pó cjapâ il so puest ni butâlu in bande. E Crist, il Mestri ch'al fâs lûs dentri di nô, al è l'unic ch'al sa la strade par rivâ al nestri cûr, al cognòs i tims e il moment par dânus il so don. Il nestri timp e il nestri sisteme al podarès ancje jessi fûr di plomp o di scuare, inutil e di dam. Al è Crist ch'al semene tal cûr dal om e la semence e romp fûr cuant che nancje no pensin, di e gnot, rugnint o rugnant. Vino dismenteade cheste veretât di fonde? Ma alore al veve reson chel pote di plevan, cognossût jo personalmentri, ch'al veve fat scrivi sul cuaderno: "Dio ci parla il lunedì e il venerdì dalle 5 alle 6 per mezzo del Parroco". Sacrabolt! Vino di peâ la peraule di Diu? Vino di monopolizâle a tims e oraris e personis e sussidis umans? Lino vie di cjâf? Diu al fevele ancje a mieç dal predi o catechist. Ma al fevele plui par chel ch'al è che no par chel ch'al dîs.

I fruts ti àn un voli fenomenâl tal capî se un al vîf o no ce ch'al insegne. E la dutrine e va vivude. A àn di viodi, chei che nus scoltin, se ce ch'ò disìn e je cjar de nestre cjar e sanc dal nestri sanc o une lezion imparade a pampagal vie.

Une dì un zovin di chi mi à domandât cuant ch'ò intint di tacâ a fâ dutrine. I à rispuindût: "Po a son cuatri mêis ch'ò fâs dutrine!" E lui: "Cuant? A ce ore?"

"Simpri, di e gnot, fieste e disdevore, cun ducj!". Senó al è dibant fâ dutrine: si sune di çondar. Mi à fat impression un titul de Vite Catoliche dal an passât, ch'al fevelave di 1700 catechiscj e al diseve: "II vangelo ve lo insegno io!" O ài vude pôre, come di une blesteme. Parcè che il vanzeli no si lui insegne. Si lu vîf. Insieme e simpri. E chi o rivin a un altri cantin de dutrine.

O ài dite che no si à di fâ dutrine ai fruts (fale un sclip di preparazion ae prime comunione, cjamade di spirt e essenziâl tes nozions) parcè che e sarès violence. A son i gjenitors e la famee i prins catechiscj. Un pari e une mari e un nono ch'a vivin une vite cristiane, oneste, di lavôr, a fasin dutrine splendide, ancje se no san insegnâ tantis nainis. II predi, po, catechist di mistîr, al à di fâ dutrine a dut il paîs. No

esist, stant ai pedagogjiscj plui preparâts, une robe che no si puedi insegnâle a ducj i nivei. Poben, se nô o ridusìn la dutrine a une robe pai fruts o pe mularie o din la idee juste che la religjon e je robe di fruts, ch'a puedin dismetile benissim a pene comunicâts o vescolâts. Come che di fat al sucêt. Pa la cuâl, o torni a bati che no si pó dividi chê unitât naturâl ch'è je la famee, come che no si pó crevâ chê unitât naturâl ch'al è il païs. Almancul là che a àn furtune di vêlu. E alore la dutrine si fasile dute a ducj. E ognun al capissarà a carat de sô sensibilitât. Ma la stesse robe.

Nô le vin vivude cheste esperience te prime comunion di cheste sierade. E je stade une robe di dut il païs; ognun pe sô part ma ducj a àn cirût di preparâ e preparâsi a di cheste zornade: prin di dut i fruts, po i gjenitôrs, i nonos, il plevan, il muini, chei ch'a furnivin la glesie, chei ch'a preparavin i cjants, i mestris a scuele, chei ch'a vevin di pensâ pal gustâ, tes mennis di ogni domenie e di ogni dì. Ducj a Visepente a sintivin ch'è sarès stade une grande zornade par dut il païs, come che di fat e je stade e se ricuardin benon. Senó e reste une robe splendare pai fruts, ch'a saran i prins a vergognâsi di vêle fate. Dut il païs al é ogjet e sogjet di dutrine. In dutis lis situasions di timp e in ducj i moments.

E o rivìn, cul resonament, a di un altri cantin, chel dai "segns". Vuê si bat che mai sun cheste peraule, ma no mi somee che simpri si vedi il sintiment o la furtune di impirâle juste.

Il "segn" al à di sei une robe, un gjest, un at, une funzion, un alc ch'al disi tant a rivuart dal misteri ch'al à di significâ come ancje de int ch'è à di capîlu e vivilu. Pa la cuâl, un segn che a Rome o a Napuli o in Afriche al dîs e culì nol dîs redenzie di nuie, no si à di doprâlu. Al è strassât e, parie, si tradîs liturgjie e dutrine e int. (No si pó pensâ a une dutrine distacade de liturgjie). Come che no si pó disnigrâ o lassâ di bande altris robis che chi di nô a significhin tantonon. La religjon e je une robe che si sprofonde tal misteri di Diu ma ch'è à lis lidrîs tal cûr dal om. E l'om al è produsût di une tiere, di une culture, di une storie.

Par lâ sul concret, o disarai che and è segns naturâi, liturgjics, culturâi, di tradizion e vie. Par esempi il gîr des stagjons, il gîr de vite cui siei moments bieci e bruts, une sagra di païs, un perdon, une fieste di famee, un burlaç, un sut, il taramot... Dute robe che si à di "doprâle" parcè che e je vôs di Diu. Come che si à di doprâ il mût di capî la religjon, la filosofie de nestre int, il lôr concet di ben e di mâl, il lôr misurin morâl, il lôr mût di incjarnâ il vanzeli. Ancje in Friûl Crist al à semenât e ancje te tiere furlane la semence e à rot grop, cul savôr de nestre tiere. Une sane dutrine e scuèn jessi furlane. No dome di lenghe ma ancje di spirt e di contignût. Alore la dutrine e sarà tant plui induvinade e judade a capîle, parcè che e sarà intiessude e impastade tai fats de vite ch'ò vin vivude e ch'ò vivìn.

Par chel ch'al rivuarde i segns liturgjics, par esempi, a nô il fûc e la lûs nus disin tant. Parcè no doprâju plui ch'al è pussibil? Massime cumó in Avent, ch'al è dut un misteri di lûs? Te nestre glesie di

Visepente o vin foderade dute la glesie di vert, di peç e ramaçs di pin, di orâr, di osmarin e vie, cence nissun flôr di sorte. E o vin fate ancje la zoe dal avent cu lis cuatri cjandelis che si impiilis une ogni setemane fintremai che, sot Nadâl, la zoe e je dute un sflandôr e ancje l'anime e la plêf e varès di sei preparade. Ancje la int, a cjase, a impiin la lôr cjandele prin di cene o prin di lâ a butâsi, ducj insieme, e a domandin un sclip di lûs e di fede e di ben.

Compagn a scuele, là che ogni dì si fâs la polsute de vegle e de preiere. Plui dutrine di cussì! Coventino registris e classis par chês robis alì? Baste tante sensibilitât e un sclip di voli e cûr. E fantasie po. Al è dijust che i grancj moments si viviju ducj insieme, dal plui piçul al plui grant, che Diu al fevele a dutis lis etis e in dutis lis stagjons dal an e dal om.

La robe no je tant fûr di plomp, se ancje Crist al partive de realtât ch'al veve tor di sé: i prâts, i cjamps, i ucei, la semence, i arbui, l'aghe, il mâr, lis pioris... No stin a copâ il spirt de dutrine cul indutrinament e lis "categoriis" dai "sapients" ch'a san dut e salacor cun chê di savê o di spiegâ masse, a àn dismetût di crodi e a menin tal precipizi ancje chei ch'a varessin di fâur lûs. La dutrine, lu dîs ancjemo une volte, e je la vite dal predi e de int, ducj insieme ch'a cirin di jessi sâl e lûs e di vivi i moments de lôr vite di paîs ducj cul lusôr de fede, cul snait de sperance e cul calôr de caritât. Ducj a fâ dutrine e ducj a imparâle, dal unic, grant Catechist e Mestri.

La dutrine e je fate di cuatri robis di fonde. Pocjis e di sostanze: lis massimis eternis, i comandaments, lis oparis di misericordie, lis preieris di ogni dì, il puartâ la crôs par amôr di Diu, un pinsîr a di Chel là sù tai svareâts moments biei e bruts dal nestri cjaminâ di chenti volte la cjase dal Pari. E tante, tante fede; plui che no tante culture religjose e tantis cjacaris e banalitâts.

O sieri cuntune testemoneance. Il siôr Santul di Çurçuvint nol à fat, stant a ce ch'a tabain ju esperts, un'onçe di dutrine. Epûr dute la int e veve in lui un libri vivent e capibil di ducj, tant uman e tant bon ch'al jere. E a vivin inmó di chê olme che ur à lassât. Di altris bandis, là che i predis plui sevêrs a àn marturizât popul e comun a sun di pachis e di malegraciis, la int no dome e à dismenteade la dutrine ma le à sul stomi ch'a stentin inmó a parâle jú.

And è tantis manieris di fâ dutrine. La piês e je chê di slontanâ la int di Diu e di stufâle cun monadis che no tegnin il pont.

In merit po a la nestre liturgjie aquileiese, ai nestris cjants di fâju cjantâ di ducj, fruts e grancj, a lis nestris usancis ancje "paianis" (vilotis di doprâlis tai nuviçârs, tai mortoris, tai batisims, tune sagre, tradizions di Nadâl, pignarûi, benedizions dai flôrs o "mac di san Zuan", e vie) no vuei nancje jentrâ, ch'ò starès un an e al sarès il vêr discors di fâ su la dutrine. Chi o ài dome butât cualchi idee gjenerâl, di telâr. O dîs dome ch'ò preferis un paîs ch'al vîf la sô vite tal so ambient culturâl, ancje se no àn un'ore di dutrine nancje a Pasche, che no un paîs là che la dutrine e à umiliât int, storie e culture. Il prin

comandament de dutrine al è chel di no fâi capî a Crist ch'al à fate
une falope tal creânus furlans.

Visepente, Avent dal Signôr 1982
Articul gjavât fûr di *La Patrie dal Friûl*
di Març dal 1983, n. 3